

En pia memoria da

GR 2.5.86

Barla Hendry, Sedrun/Cavorgia

(G.F.) «Igl ei stabiliu che il carstgaun hagi inaga da murir.» Quels plaids ein severificai ina ga dapli cun la mort da Maria Barla Hendry-Hendry. Ella ei morta ils 6 da mars el Spital cantunal a Cuera suenter ina dolorusa malsogna.

Provegnientscha

Barla ei naschida a Rueras ils 15 d'ust 1916, pia per la gronda fiasta da Nossadunna d'ust. Perquei ha ella obtenu il num: Maria Barla. Ella ei stada il 4. affon dad 8 dils geniturs Leci Antoni ed Onna Catrina Caduff-Pally. Mettend quei affonet en tgina, sminava segir negin che quella stoppi in di aunc ir ina liunga via dalla crusch.

Giuventetgna

Barla ha giu ina biala affonza. Finidas las scolas obligatoricas eis ella stada en diversas plazzas el vitg. Naven ha ella mai vuliu ir, cunquei ch'ella schava encrescher. Ella ei daventada ina giuvna stimada e respectada.

Atgna famiglia

1938 eis ella maridada cun Benedetg Hendry, da Cavorgia. Cun curascha e plascher eis ella semessa alla lavur che muncava mai. Denton era buca l'oraziun. La létg vegn benedida cun treis affons. In retuorna beinspert ella patria eterna. Memia baul piarda ella era siu car consort. Ella resta anavos cun dus affons.

1960 tuorna ella a maridar il Nazi Hendry, che veva giu pressapauc la medema sort sco ella, ed era vieus. Els ein secasai el plaun s. Leci, cumprau leu casa ed in tschéc bein puril. La veta quotidiana mava stupent vina-von. Da menziunar eisi ch'ella ei stada buca meins che 20 onns calustra dalla caplutta da s. Leci. Cun el ha ella segir in bien intercessur en tschiel. Era ei la defuncta stada ina buna madregna pils affons da Nazi Hendry-Schmidt a Cavorgia. Insumma - ella fuva ina



femna da siu fatg e segidava nua ch'ei sedumandava.

Serasontga e pitir

1984 entscheiva la dolorusa via dalla crusch. In mal malign sefa valer. Ella serenda el spital cantunal, ei vegnida operada, denton il success ei buca semussaus. Ella ha piars il plaid per adina. Suenter sia dimora en spital, ei la Barla serendida ella Casa s. Vigeli a Sedrun. Leu han las bunas soras ed il persunal fatg bien cun ella. Ella sto puspei returnar el spital a Cuera. La dolorusa via dalla crusch secontinuescha tochen che la mort vegn sco liberatura.

In grond pievel ha accumpignau la defuncta ils 8 da mars alla fossa. Il Segner detti ad ella la pagaglia per tut bien prestau sin tiara. Al consort Nazi ed allas famiglias en malencurada nossa sincera condolientscha!